

दिनांक : 28.01.2022

समय : 06:50 पीएम

आकाषवाणी जयपुर-अजमेर  
प्रादेशिक समाचार

- प्रधानमंत्री नरेंद्र मोदी दिल्ली मांय एनसीसी रैली मांय कह्यो-नौजवान स्टार्टअप्स हलका मांय भारत ने दुनिया रा अगाडी तीन देशां मांय पूगायो।
- देश मांय केवल 19 दिन मांय एक करोड़ ऊं बत्ता स्वास्थ्य कर्मचारियां अर दूजा पात्र लोगां रे कोविड ऊं बचाव री एहतियाती खुराक लगायी ज्यी।
- सुप्रीम कोर्ट अनुसूचित जाति-जनजाति तबका रा कर्मचारियां ने पदोन्नति मांय आरक्षण रा मामला मांय 24 फरवरी ने आगली सुणवायी करेला।
- मुख्यमंत्री अशोक गहलोत राज्य मांय अपराधां रा हालात रो जायजो लीनो।
- प्रदेश मांय जबरदस्त ठंड-माउंट आबू, राजसमंद अर जोबनेर मांय पारो माइनस मांय।

000

देश रा केई हलका मांय कोविड रा तेजी ऊं बधता मामलां नै ध्यान राखता थकां सगळा सुणबा वाळा ऊं सावचेत रेहवण अर कोविड ऊं बचाव रा टीका री दोन्यू खुराक लगवावण री अपील है। 15 ऊं 18 साल उम्र वाळां सारु देशभर मांय कोविड ऊं बचाव रा टीका लगावण रो अभियान चलायो जा रह्यो है। ई बीचे कोरोना वायरस री नुवी भांत री ठा पड्यां पाछै सुणबा वाळां ऊं अरज है कै टेमसर कोविड ऊं बचाव रा टीका री दोन्यू खुराक लगवाओ सा अर दूजा लोगां नै ई अ टीका लगवावण मांय मदद करो। कोविड ऊं बचाव सारु आं तीन आसान उपायां री पालना करो सा-

- मास्क जरूर लगावणो है।
- दो गज री सुरक्षित दूरी बणायी राखणी है।
- अर हाथ अर मुंह साफ राखणा है।

000

प्रधानमंत्री नरेंद्र मोदी कह्यो है के ज्यीं देश रा नौजवान राष्ट्र पहले री सोच सागे आगे बधे है, वां ने दुनिया री कोई ताकत नी रोक सके है। वे आज दिल्ली कैंट रा करियप्पा परेड ग्राउंड मांय नेशनल कैडेट कोर पीएम रैली मांय बोल रहया हा। प्रधानमंत्री मौजूदा दौर रा नौजवानां रा लोकल फॉर वोकल अभियान मांय खास काम माथे ई ज़ोर दीनो। वे कह्यो के गर नौजवान देश रा किण ई रेहवासी री मेहनत अर पसीना ऊं बणायी ज्या सामान काम लेवण रो संकल्प लेवे तो देश रो भाग ई बदल जावेला। प्रधानमंत्री मौजूदा दौर मांय देश मांय एनसीसी ने मजबूत बणावण री कोशिशां रो जिकर ई कीनो।

.....

प्रधानमंत्री एनसीसी कैडेटां ऊं समाज मांय मोटो बदलाव लावण सारु आप-आप रा शहर अर जिलां मांय टीम बणा र पुनीत सागर अभियान ने कामयाबी सागे चलावण बाबत कह्यो। प्रधानमंत्री कह्यो के ई साल देश आजादी रो अमृत महोत्सव मना रह्यो है अर नौजवान ऐडा ऐतिहासिक आयोजन रो हिस्सो बणे तो म्हां ने नौजवानां री ताकत री झलक

निजर आवे है। वे कह्यो के साल 2047 मांय जद आजादी रा एक सौ साल पूरा व्हेला तो म्हां म्हाणा सपना सांचा व्हेता देखां। वे कह्यो के नौजवान स्टार्टअप्स रा हलका मांय भारत ने दुनिया रा आगाडी तीन देशां री जमात मांय ऊबो कर दीनो है। प्रधानमंत्री कह्यो के कोविड रे दौरान 50 ऊं बत्ता यूनिकोर्न्स साढे सात हजार करोड़ रुपया री लागत सागे सरूआत कीनी है। वे कह्यो के सगळा मिल र देश री परेशानियां रो हल निकाळ रह्या है अर राष्ट्र पहले रा मंत्र सागे काम कर रह्या है। प्रधानमंत्री कह्यो के जद भारत रो कोई खिलाडी किण ई होड मांय शिरकत करे तो वां सागे भारत रा 130 करोड़ लोग व्हे है। वे कह्यो के म्हाणा खिलाडी केवल तमगा जीतण सारु नहीं बल्कि दुनिया मांय देश री नुमाइंदगी करण सारु खेले है। प्रधानमंत्री कह्यो के कोविड रे दौरान ई म्हाणो देश कोरोना वायरस रो सामो करण री जबरदस्त भावना रो दरसाव कीनो। प्रधानमंत्री कह्यो के देश री बेटियां सैनिक स्कूलां मांय दाखिला ले रही है अर वायुसेना मांय लड़ाकू जहाज उड़ा रही है। वे कह्यो के बत्ती ऊं बत्ती लड़कियां ने एनसीसी मांय शामिल करण री कोशिश करी जा रही है। वे कह्यो के म्हां ने खुद रे पाण ऊबो भारत बणावण अर वोकल फॉर लोकल ने नुवी ऊंचाई ताई ले जावण सारु काम करणो है।

000

देश मांय केवल 19 दिन मांय हेल्थकेयर अर फ्रंटलाइन वर्कर्स अर 60 साल ऊं बत्ती उम्र वाळा पात्र लोगां रे कोविड ऊं बचाव रा टीका री एक करोड़ ऊं बत्ती एहतियाती खुराक लगा दीरीजी है। केंद्रीय स्वास्थ्य मंत्री मनसुख मांडविया ट्वीट रे ज़रिए आ जाणकारी दीनी। स्वास्थ्य मंत्रालय रे मुजब ई बगत देश मांय 21 लाख ऊं बत्ता लोगां रो कोविड रो ईलाज चाल रह्यो है अर ई बीमारी ऊं ठीक व्हेवण री रेट 93 दशमलव छह फीसदी है। देश मांय कोविड रा मामलां मांय कमी आयी है अर लारला 24 घंटा मांय दो लाख 51 हजार ऊं बत्ता मामला सामी आया। ई बीचे देश मांय हाल ताई कोविड ऊं बचाव रा एक सौ 64 करोड़ 44 लाख ऊं बत्ता टीका लगा दिया ज्या है अर कोविड री शंका वाळा 72 करोड़ 37 लाख ऊं बत्ता नमूना री जांच करी जा चुकी है। ई बीचे प्रदेश मांय आज ई कोविड रा आठ हजार 125 नुवा मामला सामी आया। आं मांय सब ऊं बत्ता 2 हजार 300 मामला जयपुर जिला रा है। जोधपुर मांय ई 707 मरीजां मांय कोरोना वायरस री मौजूदगी री ठा पडी। ई सागे ई राज्य मांय कोविड रा सक्रिय मामलां री तादाद घट र 80 हजार 488 रह गयी है। लारला 24 घंटां मांय कोविड रे कारण 21 जणां री मौत ई व्ही। दूजी कानी दौसा जिला रा मेहंदीपुर बालाजी मंदिर रा पट खोलण रा बारा मांय विचार करण सारु जिला कलेक्टर आज मेहंदीपुर बालाजी रो दौरा कर र मंदिर प्रबंधन अर कारोबारियां सागे बातचीत कीनी।

000

....

000

सुप्रीम कोर्ट अनुसूचित जाति-जनजाति रा कर्मचारियां ने पदोन्नति मांय आरक्षण रा बारा मांय अहम फैसलो सुणाता थका ई रा मानकां मांय हस्तक्षेप करण ऊं नट ग्यो है। सुप्रीम कोर्ट कह्यो है के पदोन्नति मांय आरक्षण ऊं पैली राज्य सरकारां ने समीक्षा कर र आला पदां माथे

प्रतिनिधित्व रा आंकड़ा तय मियाद मांय जुटावणो चाहिजे। जस्टिस एल. नागेश्वर राव री सदरत वाळी पीठ कह्यो के प्रतिनिधित्व रा मूल्यांकन करण री अवधि केंद्र सरकार ने तय करणी चाहिजे।

000

मुख्यमंत्री अशोक गहलोत आज न्यारा-न्यारा जिलां रा एसपी सागे वीडियो कॉन्फ्रेंसिंग रे मार्फत समीक्षा मीटिंग कीनी। वे काल ई राज्य मांय अपराधां रा हालात रो जायजो लीनो हो। मीटिंग मांय पुलिस रा आला अहलकार बतायो के मामलां री जांच मांय लागण वाळा बगत मांय ध्यानजोग कमी व्ही है। मीटिंग मांय बतायी ज्यो के लारला साल पोक्सो कानून रा तैत दर्ज मामलां मांय ऊं 510 मांय अपराधी साबित व्ह्या लोगां ने सजा दिरायी ज्यी। चार मामलां मांय सजा-ए-मौत अर 35 मामलां मांय उम्र कैद री सजा सुणायी ज्यी। एसपी सागे बातचीत मांय मुख्यमंत्री साइबर अपराधां ने रोकण सारु जिला स्तर माथे नुवा काम करण बाबत कह्यो।

000

प्रदेश मांय बजट री तैयारियां सारु व्हे गयी है। ई सिलसिला मांय आज बजट ऊं पैली री बातचीत रो दौर सारु व्ह्यो। मुख्यमंत्री अशोक गहलोत आज राज्य स्तर री कर परामर्शदात्री समिति रा सदस्यां सागे वीडियो कॉन्फ्रेंसिंग रे मार्फत बातचीत कीनी। न्यारा-न्यारा औद्योगिक अर कारोबारी संगठनां रा नुमाइंदां री ओर ऊं मीटिंग मांय राय रखी ज्यी।

000

संसद रो बजट सत्र 31 जनवरी ने सारु व्हेला। लोकसभा अध्यक्ष ओम बिरला आज संसद भवन मांय बजट सत्र री तैयारियां रो जायजो लीनो। वे लोकसभा चेम्बर, केन्द्रीय कक्ष अर संसद भवन परिसर मांय न्यारा-न्यारा सुबीतां रो मुआयनो कीनो। वे संसद भवन मांय कोविड दिशा-निर्देशां री पूरी पालना तय करण रा हुकम ई दीना।

000

प्रदेश मांय तापमान मांय गिरावट सागे पड रही ज़ोरदार ठंड ऊं जिंदगी माथे असर पड़्यो है। राज्य रा कोई 12 जिलां मांय लारली रात रे मुकाबले तापमान मांय एक डिग्री ताई री कमी आयी। संवारे अर सिंज्यां री पोर बाज रह्या सीळा बायरा ऊं ठंड रो असर और बध गयो है। माउन्ट आबू मांय न्यूनतम तापमान लगातार चौथा दिन माइनस मांय दर्ज करी ज्यो। वठे आज तडके माइनस 3 डिग्री सैल्सियस न्यूनतम तापमान दर्ज करी ज्यो। जयपुर जिला रा जोबनेर मांय ई पारो माइनस 1 डिग्री सैल्सियस दर्ज करी ज्यो। राजसमंद मांय ई ज़ोरदार ठारी पड रही है। म्हाणा खबरनवीस बतायो के वठे लगातार दो दिन ऊं पारो माइनस मांय चाल रह्यो है।

.....

सीकर जिला रा फतेहपुर मांय न्यूनतम तापमान 1 डिग्री सैल्सियस दर्ज करी ज्यो, जदके सीकर अर भीलवाडा मांय एक दशमलव 8 डिग्री सैल्सियस न्यूनतम तापमान दर्ज करी ज्यो। ई रे अलावा चित्तौड़गढ मांय 2 दशमलव 2, हनुमानगढ जिला रा संगरिया मांय 2 दशमलव 3, चूरु अर बारां जिला रा अंता मांय 3 दशमलव 1, उदयपुर मांय 3 दशमलव 6, नागौर मांय 4 दशमलव 1 अर सवाईमाधोपुर मांय 4 दशमलव 9 डिग्री सैल्सियस न्यूनतम तापमान दर्ज करी ज्यो। राज्य मांय औसत न्यूनतम तापमान आठ डिग्री सैल्सियस ऊं नीचे रह्यो। मौसम विभाग रे मुजब आज झुंझुनूं, सीकर, भीलवाड़ा, चित्तौड़गढ अर नागौर जिलां मांय कठे-कठे सीळो बायरो बाजण रा आसार है।

000

प्रधानमंत्री नरेन्द्र मोदी ई दीतवार 30 जनवरी ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 85वीं कड़ी व्हेला। प्रधानमंत्री कार्यालय रे मुजब ओ

कार्यक्रम राष्ट्रपिता महात्मा गांधी री बरसी रे मौके वां ने याद कर्या पाछे संवारे साढे ग्यारह बज्यां सरू व्हेला।

000

प्रधानमंत्री नरेंद्र मोदी रा परीक्षा पे चर्चा कार्यक्रम रा 5वां संस्करण मांय सिरकत करण सरू नाम मंडावण री आखिरी तारीख 3 फरवरी ताई बधा दीरीजी है। ई कार्यक्रम मांय देश-विदेश रा विद्यार्थी, अभिभावक अर शिक्षक प्रधानमंत्री सागे बातचीत करे है। प्रधानमंत्री ई कार्यक्रम मांय जिंदगी ने उत्सव र तौर ऊं मनावण अर परीक्षा रा तनाव ने कम करण रा बारा मांय चर्चा करे है।

शिक्षा मंत्रालय रे मुजब ओ कार्यक्रम लारला साल री भांत ई ऑनलाइन तरीका ऊं कर्यो जावेला। 9वीं ऊं 12वीं कक्षा ताई रा विद्यार्थियां ,शिक्षकां अर मायतां रो चयन ऑनलाइन होड़ रे मार्फत कर्यो जावेला।

000

आकाशवाणी जयपुर रा क्षेत्रीय समाचार एकांश री ओर ऊं अनुबंध रा आधार ऊं बाड़मेर, भीलवाडा, चित्तौडगढ, डूंगरपुर, हनुमानगढ, कोटा, जोधपुर, नागौर, पाली अर प्रतापगढ मांय अंशकालिक संवाददाता सरू अर्जियां दाखिल करण री आखिरी तारीख बधा र 31 जनवरी 2022 कर दीरीजी है। ई सरू 24 ऊं 45 साल उम्र वाळा अर्जी दे सके है। अर्जी देवण वाळा स्नातक सागै पत्रकारिता मांय डिप्लोमा या डिग्रीधारी या स्नातक सागै पत्रकारिता मांय दो साल रो अनुभव राखण वाळा व्हेवणा चाहिजै। अर्जी देवण वाळा संबंधित जिला मुख्यालय ऊं दस किलोमीटर ताई रा दायरा मांय रेहवास करण वाळा व्हेवणा चाहिजै। उम्मीदवार किण ई सियासी पार्टी सागै जुड़्या नी व्हेवणो चाहिजै या केन्द्र या राज्य सरकार अर सरकारी हलका रा उपक्रम ऊं जुड़्यो नी व्हेवणो चाहिजै।

000